



Cussegli da vischnaunca 19-2013/2016
Seduta dils 27 da fevrer 2015

Protocol

dalla seduta dil cussegli da vischnaunca,
venderdis, ils 27 da fevrer 2015, allas 20¹⁵– 22⁰⁰
en l'anteriura casa da scola a Segnas

Presidi: Edgar Durschei
Livio Zanetti, tractanda 3

Actuar: Ervin Maissen

Presents:

a) Cussegli	Christoph Berger Armin Berther Adrian Bigliel Silvio Candinas Edgar Durschei Rita Huonder-Tenner Wendelin Jacomet	Jordana Lozza-Desax Armin Manetsch Flavio Murer Adrian Pally Alfred Spescha Rico Tuor Livio Zanetti
b) Suprastanza communala	Francesg Cajacob Madlen Deflorin-Spescha	Cecilia Maissen-Desax
c) Perstgisas	Iso Mazzetta	Roger Tuor
d) Hospes	ca. 50 persunas	

"Jeu beneventel Vus alla 19avla seduta dalla perioda d'uffeci 2013/2016 cheu en l'antieriura casa da scola Segnas. Sco igl ei usit havess l'emprema seduta dil nieveligi president dil cussegl liug en siu vischinadi. Enconuschentamein ha quella giu liug en casa communal e perquei essan nus oz cheu a Segnas. Las localitads cheu ein era pli grondas e pli idealas per ils hosps.

Marco Schmed ha abdicau sco commember dil cussegl da vischernaunca. Era sche quei ei vegniu nunspitgadamein hael capientscha per quella decisiun. Ad el in grond engraziament per tut sia buna lavur ch'el ha prestau per il cussegl ed en la cumissiun da baghegiar. In successur ei aunc buca eligius aschia che nus essan pil mument 14 cussegliers.

Legreivlamein han ins saviu leger ier ella Quotidiana che la societat per il svilup dil project Acla da Fontauna ha inoltrau alla vischernaunca la damonda da baghegiar. Quei ei in fatg che fa plascher e dat slonsch en quella fatschenta. Ils investurs ein aunc d'encurir cura che la lubientscha da baghegiar ei avon maun.

Perencunter ha ei dapi nossa davosa seduta era dau biaras turbulenzas. Aschia vegn il ferm franc svizzer, las mesiras pridas dalla FINMA e la decisiun dall'ulivaziun da finanzas naziunala era a tuccar nus. La mesjamna han ins saviu leger ella Quotidiana che la Distec SA ha stuiu menar en lavur cuorta. Ei vegn gia prognosticau ina deflaziun ni recessiun per la Svizra.

La suprastonza ei perquei permanentamein en l'obligaziun da mirar nua ch'ei sa vegnir spargnau tier las expensas. Il preventiv decidiu en nossa davosa seduta ei ina rama da cuosts dada avon dil cussegl. Sco il president communal ha sez detg ella davosa seduta, astgan las summas previdas per las singulas spartas buca automaticamein vegnir duvradas. Ei sto vegnir ponderau miniziusamein sche l'expensa ei giustificada. La refusaziun dil preventiv cun la pretensiun da spargnar ei stau mo l'entschatta, in emprem pass d'in liung viadi.

En la situazion dad oz sto igl alzament da taxas esser tabu. Perencunter sto la reducziun dil pei da taglia esser la finamira. Nus stuein mirar ch'ei vegni purtau dapli devisas en nossa vischernaunca, devisas che vegnan lu dadas ora cheu. Quei san ins denter auter contonscher cun persunas che laian pensiunar e vegnan cheu a secasar ni cun persunas che quentan ch'ei seigi attractiv da habitar tier nus ed anflan cheu habitaziun. Entochen ussa era quei era pusseivel cun construir secundas habitaziuns e vender elllas a hosps da vacanzas.

Aunc pli impurtont ei perquei ussa che la vischernaunca impundi ils daners dils pagataglia en nossa regiun e buca ella bassa. Quei perfin era sch'il prezi ei tier nus pli aults. Seigies pertscharts, tochen che la vischernaunca sa dar ora frs. 100'000.--ston persunas giuridicas ni privatas haver pagau taglia da vischernaunca sin entradas da 1.5 – 2.0 milliuns francs (steuerbares Einkommen). Pér cura ch'ins ponderescha inagada aschi lunsch, tgei quei basegna, sto la vischernaunca esser pertscharta che quels daners ston restar cheu. Mo lu dat ei era puspei daners da taglia sin quellas expensas e buca sch'els ein dai ora ella Bassa. Nus stuein tuts trer vid il medem sughet.

Actualmein ei la piazza per il meinafatschenta dil CSC publicada. Lein sperar che la suprastonza communal ensemen cun la cumissiun da menaschi dil CSC vegn a metter entuorn las pretensiuns politicas e nezegiar la schanza da midar las cundiziuns per la piazza pil meinafatschenta dil Center da sport e cultura.

Igl alzament dallas taxas da hosps e da turissem ha caschunau vinavon grondas discussiuns. Il commerci senta la malaveglia dils possessurs da secundas habitaziuns. La solia pusseivladad ch'els hagien per mussar lur malcuntentienscha seigi da buca pli cumprar en en nossa regiun, dian ils possessurs. Per ch'ei detti buca ina dinamica buca giavischada e per tgirar nos megliers hosps, quels che vegnan era denter sesiun regularmein tier nus, pagan cheu taglia e consumeschon ella regiun, stuein nus tgirar tals e gudignar lur sustegn e capientscha. Sonda

sontga, ils 4 d'avrel ha liug allas 15.00 uras (suenter skis) a Pignola ella scrinaria da Victor Flepp ina discussiun da podi cun las instanzas politicas, il commerci, il turissem, ils possessurs da secundas habitaziuns e la populaziun interessada. Quella discussiun vegn moderada dad ina persuna dil fatg. Purtei quei termin en Vossa agenda e segies presents quei di.

L'olimpiada d'unviern organisada dall'Uniun da giuventetgna Mustér, fracziun Vitg, la davosa fin d'jamna ei stada in success. Varga 70 giuvens e vegls han sefutront dalla malaura fatg part a quels giugs el liber. Da mia vart in grond engraziament pigl engaschi ed in cumpliment per las ideas e la bunaveglia en favur dils affons e da pli bia moviment. Saiel mo cusseglar quei per in'autra gada.

Dapi la davosa seduta dil cussegl da vischnaunca han suandonta vischina e suandonts vischins bandunau il terrester. Cun in bien patratglein nus seregurdar da: Isidor Caminada da Mumpé Medel, naschius igl 1. d'uost 1931, morts ils 24 da schaner 2015; Robert Deflorin da Peisel, naschius ils 28 da schaner 1937, morts igl 1. da fevrer 2015; Victor Candinas da Dulezi, naschius ils 18 da schaner 1925, morts ils 6 da fevrer 2015, Rosa Giger d'Acletta, naschida ils 29 da mars 1938, morta ils 16-02-2015. Victor Candinas ha instruiu la scola cumplessiva a Mumpé Medel e silsunter biars onns alla scola dil Vitg. Plinavon ha ina lavina satrau ils 2 da fevrer 2015 nies premurau menader dalla scola da skis, Franco Tomaschett staus biars onns scolast da skis a Mustér.

Els ruaussien en pasch.

Fetg grond plascher hiel jeu da comunicar la naschientscha da Florin, naschius ils 9 da fevrer 2015, fegl da Marina Rösche e da Stefan Columberg. Cordial beinvegni ed als loschs geniturs nossa cordiala gratulaziun."

Tractandas:

1. Protocols nr. 17 - e 18 - 2013/2016
2. Lescha da scola: Revisiun totala (messadi nr. 22-2013/2016)
3. Dretg da construcziun Sut Gliendas (messadi nr. 23-2013/2016)
4. Ura da damondas (conform ad art. 44 dil regulativ da fatschentas)

Cussegl da vischnaunca Disentis/Mustér
Il president: Igl actuar:

Edgar Durschei

Ervin Maissen



Cussegli da vischnaunca 19-2013/2016
Seduta dils 27 da fevrer 2015

1. Protocols nr. 17- e 18-2013/2016

President dil cussegli da vischnaunca

Ils protocols ein vegni tarmess tier per posizion. Enteifer ils tschun dis fixai ei vegniu inoltrau neginas objecziuns che havessen pretendiu ina midada.

Ils protocols nr. 17-2013/2016 dalla seduta dils 12 da decembre 2014 e nr. 18-2013/2016 dalla seduta dils 16 da schaner 2015 vegnan approvai senza midadas.

Cussegli da vischnaunca Disentis/Mustér
Il president: Igl actuar:

Edgar Durschei

Ervin Maissen



2. Lescha da scola: Revisiun totala (messadi nr. 22-2013/2016)

Suprastonza communal

En num dalla suprastonza communal presenta geraua Madlen Deflorin-Spescha la fatschenta. Ei setracta d'ina revisiun totala che ha per consequenza, ch'ins ha a vesta dils fatgs che vegnan reglai entras il dretg cantunal saviu desister da plirs artechels. Plinavon dispona la scola oz d'in meinascola, quei ch'era aunc buca risguardau ella lescha veglia. Las midadas ein menziunadas el messadi.

Discussiun davart la debatta d'entrada

Il cussegli da vischraunca desista da menar ina discussiun generala davart quella fatschenta, aschia ch'igl ei decidiu d'entrar e tractar la fatschenta.

Discussiun en detagi

Cusseglier Wendelin Jacomet

Art. 12, al. 5 Organisaziun, protocols

La formulazion duei vegnir adattada allas prescripziuns digl art. 49, al. 2 dalla constituziun communalia tenor il qual il meinascola pren part dallas sedutas dil cussegli da scola.

Suprastonza communal

La suprastonza communalia sa s'accordar cun la proposta da cusseglier Wendelin Jacomet, aschia che art. 12, al. 5 secloma sco suonda:

⁵Il meinascola fa part dallas sedutas dil cussegli da scola cun vusch consultativa. Eis ei indicau sa il cussegli da scola envidar allas sesidas ulteriuras persunas cun vusch consultativa.

Cusseglier Flavio Murer

Art. 13 Habilitad da decider

La formulazion duei vegnir adattada allas prescripziuns digl art. 49, al. 4 dalla constituziun communalia tenor il qual il meinascola pren part dallas sedutas dil cussegli da scola.

Suprastonza communal

La suprastonza communalia sa s'accordar cun la proposta da cusseglier Flavio Murer, aschia che art. 13 secloma sco suonda:

¹Il cussegli da scola sa prender decisiuns sche silmeins treis commembers ein presents. Scadin commember dil cussegli da scola che assista allas sedutas ei obligaus da votar.

²En cass da paritat da vuschs dat il president la decisiun da tagl.

Art. 14, al. 2, cefra 22 Obligaziun e cumpetenzas

A vesta dallas discussiuns occurridas en connex cul preventiv duein las cumpetenzas finanzialas dil cussegl da scola buca vegnir augmentadas. Perquei duei il cussegl da scola saver disponer vinavon da maximalmein frs. 2'000.-- ad onn sco quei ei stipulau ella lescha actuala da scola sut art. 25, al. 2 cefra 21. Tonpli ch'il cussegl da vischnaunca ei a vesta dalla situaziun finanziala sedecidius da desister da sia indemnisiun.

Suprastonza communală

Cun la nova formulaziun sa il cussegl da scola disponer enteifer in onn dalla summa maximala da frs. 10'000.-- ed el cass singul da maximalmein frs. 5'000.-- pia da maximalmein 2 gadas frs. 5'000.-- ad onn. El decours dils onns ein ils basegns semidai. La summa da maximalmein frs. 10'000.-- ei a vesta dallas incaricas dil cussegl da scola buca exagerada.

Decisiun

Cun 8 encunter 4 vuschs e 2 abstensiuns decida il cussegl da vischnaunca en favur dalla proposta da cusseglier Wendelin Jacomet, aschia ch'igl art. 14, al. 2, cefra 22 secloma sco suonda:

22. decider davart expensas unicas e buca previdar el preventiv entochen frs. 2'000.-- per onn;

Cussegl da vischnaunca

Las incaricas circumscretas egl art. 51 dalla constituziun communală duessen esser menziunadas egl art. 14 dalla lescha da scola revedida.

Tgei funcziun ha il cussegl da scola en connex cun ils transports da scola?

Suprastonza communală

Tenor il senn ein las incaricas circumscretas egl art. 51 dalla constituziun communală vegnidas surpridas egl art. 14, al. 2 dalla lescha da scola.

L'organisaziun dils transports da scola ei detg complexa. Ils transports ston secumportar cul menaschi da scola e da l'autra vart tener quen allas pusseivladads finanzialas dalla vischnaunca. Perquei succeda la preparaziun dalla fatschenta entrais il meinascola ensemen cun la direcziun. Il cussegl da scola approbescha la proposta dalla direcziun.

President dil cussegl da vischnaunca

Dat la pusseivladad da revegnir.

Cussegl da scola

Tgei consequenzas finanzialas ha la revisiun dalla lescha da scola pil menaschi finanzial dalla vischnaunca?

Tgei persunas fuorman la direcziun da scola e tgei funcziun ha la direcziun?

Suprastonza communală

Las decisiuns che han influenza sil menaschi finanzial dalla vischnaunca ha il Cussegl grond gia priu cun reglar quellas ella lescha da scola cantunala. Las midadas dalla lescha da scola communală han negin'influenza finanziala. La revisiun dalla lescha da scola communală ei ina consequenza dallas decisiuns gia pridas sin palancau cantunal.

La direcziun da scola secumpona dil gerau dil scolaresser, dil president dil cussegl da scola e dil meinascola. La direcziun prepara las fatschentas da tempra speciala per mauns dil cussegl da scola.

Decisiun

Cun 13 encunter 0 vuschs ed 1 abstensiun decida il cussegl da vischnaunca:

- *d'approbar la revisiun totala dalla lescha da scola;*
- *da suttametter quei conclus el senn d'art. 21, lit. b dalla constituziun communalala al referendum facultativ.*

Cussegl da vischnaunca Disentis/Mustér
Il president: Igl actuar:

Edgar Durschei

Ervin Maissen



3. Dretg da construcziun Sut Gliendas (messadi nr. 23-2013/2016)

Ord motivs d'interess da fatschenta s'absenta il president dil cussegli da vischnaunca duront la tractaziun da quella fatschenta. La fatschenta vegn empalada entras il vicepresident dil cussegli da vischnaunca Livio Zanetti.

Suprastanza communal

En num dalla suprastanza communal presenta il president communal Francesc Cajacob la fatschenta.

El rom dallas contractivas ei la pleiv plitost interessada da vender la parcella 3027. Quella communicaziun davart dalla pleiv ei succedita pér suenter ch'il messadi ei staus tarmess al cussegli da vischnaunca. Tenor conclus dil cussegli da vischnaunca da questa sera vegness ins a menar vinavon las contractivas cun la Pleiv S. Gions.

La politica da sanadad cantunala sebasa sin suandontas treis petgas:

- L'assistenza e tgira ambulonta che succeda entras las organisaziuns dalla spitex. En nies cass dalla Spitex Cadi.
- La tgira en casa da tgira. Cheu exista ina purschida entras la fundaziun PUNTREIS.
- Il habitar accumpignau. Cheu exista en nossa regiun negina purschida. La fundaziun PUNTREIS preveda la construcziun da habitaziuns en connex cun la serrada dalla Casa Sogn Vigeli a Sedrun. In secund project davart l'interessenza privata exista cun realisar ina surbaghegiada a Sut Gliendas.

Il basegns per la construcziun da habitaziuns cugl intent dil habitar accumpignau ei avon maun. Il project previu a Sut Gliendas sebasa sin interess privat senza participaziun finanziara davart dalla vischnaunca. La vischnaunca restrenschia sia activitat cun metter a disposiziun il terren en dretg da construcziun.

La parcella pertuccada sesanfla enteifer la zona per edifecis publics. Il diever da quella zona ei restrenschius pil diever public. Perquei ston ils investurs era ademplir pliras cundiziuns. Il tscheins da baghegiar vegn fixaus tenor in tscheins hipotecar da referenza ed ei fixaus actualmein sin 2.5%.

En connex cun habitar accumpignau ha la suprastanza communal giu fatg ina retscherca davart l'interessenza. Dils 400 questiunaris reparti ein 320, pia ca. 80%, vegni returnai. Igl ei semussau che las biaras persunas vulan restar aschi ditg sco pusseivel independentas cun la pusseivladad da saver far diever dallas purschidas avon maun. Plinavon ei semussau ch'igl interess per ina purschida en connex cul habitar accumpignau e la promtadad da far diever da quella ei avon maun.

Discussiun davart la debatta d'entrada

Cussegli da vischnaunca

Oz va ei per conceder il dretg da baghegiar sin la parcella Sut Gliendas. Ei va buca per objects da speculaziun, mobein per ina residenza da habitar per persunas els onns. Dapi entgins onns ei vegniu retschercau sligiaziuns entrais ina gruppera da lavour e vischinas da nossa vischnaunca.

Nus mo savein beneventar l'iniziativa privata en favur da quei project. Mintga investur ei beinvegnus en nossa vischnaunca. Nus tuts savein che la casa pervenda veglia e contuorn pretenda urgentamein ina remedura. Cun quei project sa era quella pendenza vegin sligiada.

Ultra da quei generescha il dretg da baghegiar entradas supplementaras en cassa communal e gida a mantener las plazzas da lavour en nossa regiun. Egl actual temps nua ch'ins plaida d'ina crisa ell'economia ch'ei naschida ord l'iniziativa da secundas habitaziuns, il ferm franc svizzer eav. han las interpresas da sbatter cun peis e mauns per mantener las plazzas da lavour numdi scaffir novas. La Distec SA a Mustér ha gest annunziau lavour cuorta e quei per sis meins.

La residenza da seniors che vegn actualmein projectada entrais ina cumissiun da baghegiar dalla fundaziun PUNTREIS en Val Tujetsch ei da beneventar. Ils gremis politics dallas vischnauncas da Sursassiala han giu creau las premissas politicas per quei impurtont pass. Quei project sto vegin realisaus. Tut igl auter fuss buca correct e creass ina fallida basa da cooperaziun.

La damonda ei denton plitost tgei che capeta cun nos vischins els onns? Stattan ei cheu a Mustér, serenden els ella Val Tujetsch ni van ei a Glion?

Dil reminent vegn projectau a Glion sper il spital regiunal ina residenza per attempai cun 60 entochen 70 habitaziuns cun localitads per miedis ed ina passarella direct el spital.

Vul nostra vischnaunca far frunt ad ina sperdita da potenzial economic e da pagataglias, lu sto ella conceder als investurs privats il dretg da baghegiar a Sut Gliendas.

Discussiun en detagi

Cussegli da vischnaunca

En connex cun la presentaziun dalla fatschenta ha il president communal fatg allusiu che la pleiv fussi plitost interessada da vender la parcella dalla casa pervenda veglia. En quei senn ha ei dau ina midada enviers la proposta formulada el messadi. Formalmein eis ei pia necessari d'adattar la proposta alla situaziun semidada e cheutras procurar per la segirtad giuridica necessaria.

Suprastonza communal

La vischnaunca ei obligada d'acquistar terren che sesanfla ella zona per edifecis publics, aschinavon ch'il proprietari da terren giavisch quei. A vesta digl acquist eis ei necessari da menar contractivas davart il prezi da cumpra denton era davart ils cuosts per la spazzada dalla casa pervenda veglia. En mintga cass vegn il terren mess a disposiziun als investurs per las medemas condiziuns sco il terren dalla vischnaunca.

Cusseglie Flavio Murer

Cunquei che la pleiv ei interessada da vender la parcella 3027 enstagl da conceder in dretg da construcziun, duei la proposta tenor il messadi vegin adattada alla situaziun semidada.

La seduta vegn cuort interruotta per redeger la formulaziun dalla proposta nova.

Vicepresident dil cussegl da vischnaunca

La proposta surluvrada secloma sco suonda:

1. *da conceder in dretg da construcziun sin las parcellas 3932 e 3027 a Sut Gliendas;*
2. *d'autorisar la suprastonza communal da menar contractivas cun la Pleiv S. Gions per la cumpra dalla parcella 3027;*

Cussegl da vischnaunca

Existan cunvegnes denter la vischnaunca e la fundaziun PUNTREIS concernent la construcziun da habitaziuns per attempai? Ha il cantun sclariu il basegns davart habitaziuns per seniors, resp. il habitar accumpaignau?

Exista davart dil cantun ina posiziun concernent sustener il habitar accumpaignau?

Suprastonza communal

Quei che pertucca il habitar accumpaignau existan davart dil cantun neginas retschercas davart il basegns. La planisaziun cantunala cumpeglia sulettamein il basegns davart las casas da tgira. En quei connex pretenda il cantun ch'ina casa da tgira stoppi disponer d'in diember minimal da 50 letgs. Casas da tgira cun in diember da letgs sut 50 vegnan buca risguardadas ed obtegnan neginas contribuziuns cantunalas.

Ei dat neginas cunvegnentschas denter la fundaziun PUNTREIS e la vischnaunca concernent il habitar accumpaignau. La vischnaunca fuorma cun las vischnauncas da Medel e Tujetsch la fundaziun purtadra ed ei cheutras ligiada als conclus pri el miez dalla fundaziun PUNTREIS.

Il cantun sostegn buca la construcziun da habitadis accumpaignai. Denton sostegn il cantun el rom dallas prestaziuns supplementaras tier las rentas ils singuls cass, aschinavon che la situaziun economica dallas persunas pertuccadas pretenda quei.

Il president communal citescha en quei senn era ina posiziun ch'el ha retschiert davart dil cantun.

Cussegl da vischnaunca

El rom dalla realisaziun dil project duein las premissas indicadas el memorandum da baghegiar era haver vigur per la surbaghegiada a Sut Gliendas. Tonpli che quels baghetgs duein ir a prau culs baghetgs dils quartiers circumdants. Baghetgs senza grunda duessen buca esser pusseivels.

Suprastonza communal

Quella damonda sto vegnir giudicada entras l'instanza da baghegiar. Denton pren la suprastonza communalda encunter quell'objecziun.

Cussegl da vischnaunca

Proximamein vegn la Via Sogn Gions sanada. Fuss ei buca pli prudent da spitgar cun la sanaziun da quella via entochen che la surbaghegiada a Sut Gliendas ei realisada? Cun quella caschun savess ins evtl. era dismetter mirs e slargar empau la via?

Ensemens cun la parcella 3027 s'augmenta il tscheins annual pil dretg da baghegiar da frs. 8'025.-- sin frs. 10'375.--. Vala quei tscheins pigl entir cuoz dil dretg da construcziun?

Corrispunda la valeta dil terren cun frs. 200.-- m² allas pretensiuns dil temps? En tgei altezia semova la contribuziun da perimeter vid la sanaziun dalla Via Sogn Gions per la surfatscha che vegg messa a disposiziun en dretg da construcziun?

Suprastonza communal

Igl ei buca previu da spustar la sanaziun dalla via. Cun ina megliera fundaziun duess ei denton esser pusseivel da risguardar il traffic. Plinavon eis ei previu da risguardar quei fatg cun la realisaziun della cuvrida. Ulteriuramein san ins prevegnir al traffic cun far diever digl access ton sco pusseivel directamein sur la Via Sontga Gada.

Il tscheins vala per tschun onns. Silsuenter vegg la valeta dil terren giudicada danovamein. Medemamein vegg il tscheins da referencia adattaus alla situaziun semidada.

La cumissiun da valetaziun ha valetau il terren dalla parcella 3027 cun frs. 80.-- per m². En quei senn duess la valeta da frs. 200.-- per m² esser correcta. La summa che quella surfatscha paga sco contribuziun vid la sanaziun dalla Via Sogn Gions mutta approximativamein a frs. 48'000.--. Quella summa sto la vischnaunca era pagar sche la parcella vegg buca surbaghegiada.

Decisiun

Cun 13 encounter 0 vuschs decida il cussegli da vischnaunca:

1. *da conceder in dretg da construcziun sin las parcellas 3932 e 3027 a Sut Gliendas;*
2. *d'autorisar la suprastonza communal da menar contractivas cun la Pleiv S. Gions per la cumpra dalla parcella 3027;*
3. *da suttametter quei conclus el senn d'art. 21, lit. d dalla constituziun communal al referendum facultativ.*

Cussegli da vischnaunca Disentis/Mustér
Il president: Igl actuar:

Edgar Durschei

Ervin Maissen



4. Ura da damondas (conform ad art. 44 dil regulativ da fatschentas)

Suprastanza communal

Igl ei vegniu inoltrau neginas damondas a scret.

Cussegli da vischnaunca

Dacuort ha giu liug in'informaziun co nies cantun ei representaus all'exposizion mundiala dad uonn a Milaun. Milaun ei gest quella regiun, dalla quala nus spitgein adina dapli hospes, buca il davos cun l'avvertura sur onn dil pass Lucmagn.

Gest ussa ch'in tal eveniment ha liug avon esch-casa, par'ei che nus seigien puspei presents mo cun ina pintga crena el granit che representa nossa regiun muntagnarda e turistica. La tematica principala presentada ei la regiun dil Gottard cun las auas che flessegian en tuttas direzioni. Sco intervegniu deriva denton la representanza turistica sulettamein da destinaziuns dil sid.

La suprastanza duei intervegnir per che las destinaziuns da nossa regiun seigien medemamein risguardadas sufficientamein.

Ei vegn giavischau ch'ils commembers dalla suprastanza communalia seigien per regla presents allas sedutas dil cussegli da vischnaunca.

Suprastanza communal

La suprastanza communalia pren encunter ils giavischs ofniai dil cussegli.

Ils 12 da mars 2015 ha liug en halla Cons sut il tetel „Graubünden bewegt“ ina sera d'informaziun davart activitads per attempai 55+.

Ils 9 da matg 2015 ha liug sut il tetel Svizra en moviment in'occurrenza el Center da sport e cultura cugl intent d'activar la populaziun pil moviment. Quell'occurrenza ha liug per la 11avla gada cun participaziun da 177 vischnauncas. Ord il Grischun prendan las vischnauncas da Glion, Poschiavo e Mustér part. Entochen ussa han mo paucas uniuns documentau interess. La participaziun dad ulteriuras uniuns ed interessants ei dumandada e beinvegnida.

President dil cussegli da vischnaunca

La proxima seduta dil cussegli da vischnaunca ha liug prevedentamein venderdis, ils 27 da mars 2015.

Plinavon fa il president allusiu d'entginas occurrentas che han liug il proxim temps a Mustér.

Cusseglier Armin Berther envida en num dil vischinadi da Segnas ils presents ad in aperitiv ch'ei vegnius sponsuraus dil president dil cussegli. Il Chor viril e da baselgia da Segnas delectescha ils presents cun entginas canzuns.

Pendenzas

Fatschenta/Sparta	Termin	Responsabel	Remarcas
Recav dil gudogn dalla cuminanza da maschinas forestalas Cadi	Ils 27 da fevrer 2016	Gerau Roger Tuor	
Priorisaziun dallas investiziuns, gliesta	Primavera 2015	Suprastanza communal	
Finanziaziun bus local cto. 651.315.00 Cumpart interessenza turistica	Preventiv 2016 November 2015	President communal	

Cussegli da vischernaunca Disentis/Mustér
Il president: Igl actuar:

Edgar Durschei

Ervin Maissen

Disentis/Mustér, ils 8 da mars 2015

C:\Users\maissen\Documents\Vischernaunca\Cussegli da vischernaunca\cussegli da vischernaunca 2013-2016\Protocols\Cus0016_19.docx